

नमो नमो निम्मलदंसणस्स
पूज्य आनंद-क्षमा-ललित-सुशील-सुधर्मसागर गुरुभ्यो नमः

On Line – आगममंजूषा

[१९] निरयावलियाणं

* संकलन एवं प्रस्तुतकर्ता *

मुनि दीपरत्नसागर [M.Com., M.Ed., Ph.D.]

॥ किंचित् प्रास्ताविकम् ॥

ये आगम-मंजूषा का संपादन आजसे ७० वर्ष पूर्व अर्थात् वीर संवत् २४६८, विक्रम संवत्-१९९८, ई.स.1942 के दौरान हुआ था, जिनका संपादन पूज्य आगमोद्धारक आचार्यश्री आनंदसागरसूरिजी म.सा.ने किया था। आज तक उन्हीं के प्रस्थापित-मार्ग की रोशनी में सब अपनी-अपनी दिशाएँ ढूँढते आगे बढ़ रहे हैं।

हम ७० साल के बाद आज ई.स.-2012, विक्रम संवत्-२०६८, वीर संवत्-२५३८ में वो ही आगम-मंजूषा को कुछ उपयोगी परिवर्तनों के साथ इंटरनेट के माध्यम से सर्वथा सर्वप्रथम “**OnLine-आगममंजूषा**” नाम से प्रस्तुत कर रहे हैं।

* मूल आगम-मंजूषा के संपादन की किंचित् भिन्नता का स्वीकार *

- [१] आवश्यक सूत्र-(आगम-४०) में केवल मूल सूत्र नहीं है, मूल सूत्रों के साथ निर्युक्ति भी सामिल की गई है।
[२] जीतकल्प सूत्र-(आगम-३८) में भी केवल मूल सूत्र नहीं है, मूलसूत्रों के साथ भाष्य भी सामिल किया है।
[३] जीतकल्प सूत्र-(आगम-३८) का वैकल्पिक सूत्र जो “पंचकल्प” है, उनके भाष्य को यहाँ सामिल किया गया है।

[४] “ओघनिर्युक्ति”-(आगम-४१) के वैकल्पिक आगम “पिंडनिर्युक्ति” को यहाँ समाविष्ट तो किया है, लेकिन उनका मुद्रण-स्थान बदल गया है।

[५] “कल्प(बारसा)सूत्र” को भी मूल आगममंजूषा में सामिल किया गया है।

-मुनि दीपरत्नसागर

: Address:-

Mnui Deepratnasagar,
MangalDeep society, Opp.DholeswarMandir,
POST:- THANGADH Dist.surendranagar.
Mobile:-9825967397 jainmunideepratnasagar@gmail.com

मुनि दीपरत्नसागर



१३) श्रीनिरयावलिकोपाङ्गम् । नमः श्रुतदेवतायै ॥ तेणं कालेणं तेणं समएणं रायगिहे नामं जयरे होत्था रिद्धत्थिमियसमिद्धे० गुणसिलए चेइए वन्नओ, असोगवरपायवे पुढवीसिलापट्टए । १ । तेणं कालेणं० समणस्स भगवओ महावीरस्स अंतेवासी अज्जसुहम्मस्स नामं अणगारे जातिसंपन्ने जहा केसी जाव पंचहिं अणगारसएहिं सद्धिं संपरिवुडे पुव्वाणुपुव्विं चरमाणे जेणेव रायगिहे नगरे जाव अहापडिरूवं उग्गहं ओगि-
 ण्हित्ता संजमेणं जाव विहरति, परिसा निग्गया, धम्मो कहिओ, परिसा पडिगया । २ । तेणं कालेणं० अज्जसुहम्मस्स अणगारस्स अंतेवासी जंबू णामं अणगारे समचउरंससंठाणसंठिए जाव संखित्तविउलतेयलेस्से अज्जसुहम्मस्स अणगारस्स अदूरसामंते उड्ढंजाणू जाव विहरति । ३ । तए णं से भगवं जंबू जातसड्ढे जाव पज्जुवासमाणे एवं वयासी-उवंगाणं भंते ! समणेणं जाव संपत्तेणं के अट्टे पण्णत्ते ?, एवं खलु जंबू ! समणेणं भगवया जाव संपत्तेणं एवं उवंगाणं पंच वग्गा पं० तं०-निरयावलियाओ कप्पवडिंसियाओ पुप्फियाओ पुप्फचूलियाओ वण्हिदसाओ, जइ णं भंते ! समणेणं जाव संपत्तेणं उवंगाणं पंच वग्गा पं० तं०-निरयावलियाओ जाव वण्हिदसाओ पढमस्स णं भंते ! वग्गस्स उवंगाणं निरयावलियाणं समणेणं भगवया जाव संपत्तेणं कइ अज्झयणा पं० ?, एवं खलु जंबू ! समणेणं जाव संपत्तेणं उवंगाणं पढमस्स वग्गस्स निरयावलियाणं दस अज्झयणा पं० तं०-काले सुकाले महाकाले कण्हे सुकण्हे तहा महाकण्हे वीरकण्हे य बोद्धवे रामकण्हे तहेव य पिउसेणकण्हे नवमे दसमे महासेणकण्हे उ । ४ । जइ णं भंते ! समणेणं जाव संपत्तेणं उवंगाणं पढमस्स वग्गस्स निरयावलियाणं दस अज्झयणा पं० पढमस्स णं भंते ! अज्झयण-
 स्स निरयावलियाणं समणेणं जाव संपत्तेणं के अट्टे पं० ?, एवं खलु जंबू ! तेणं कालेणं० इहेव जंबुद्दीवे दीवे भारहे वासे चंपा नामं नयरी होत्था रिद्ध०, पुन्नभदे चेइए, तत्थ णं चंपाए नयरीए सेणियस्स रत्तो पुत्ते चेह्णुणाए देवीए अत्तए कूणिए नामं राया होत्था महता०, तस्स कूणियस्स रत्तो पउमावई नामं देवी होत्था सोमाला जाव विहरइ, तत्थ णं चंपाए नयरीए सेणियस्स रत्तो भज्जा कूणियस्स रत्तो चुह्णुमाउया काली नामं देवी होत्था सोमाला जाव
८९३ निरयावल्याद्युपांगपंचकं, ० निरयावलियाणं -

मुनि दीपरत्तसागर

सुरूया, तीसे णं कालीए देवीए पुत्ते काले नामं कुमारे होत्था सोमाल जाव सुरूवे । ५। तते णं से काले कुमारे अन्नया कयाई तीहिं दंतिसहस्सेहिं तीहिं रहसहस्सेहिं तीहिं आससहस्सेहिं तीहिं मणुयकोडीहिं गरुलवूहे एकारसमेणं खंडेणं कूणिणं रत्ना सद्धिं रहमुसलं संगमं ओयाए । ६। ततेणं तीसे कालीए देवीए अन्नदा कदाई कुडुंबजागरियं जागरमाणीए अयमेयारूवे अज्झत्थिए जाव समुप्पजित्था-एवं खलु ममं पुत्ते कालकुमारे तीहिं दंतिसहस्सेहिं जाव ओयाए, से मन्ने किं जइस्सति? नो जइस्सति? जीविस्सति? णो जीविस्सति? पराजिणिस्सइ? णो पराजिणिस्सइ? कालं णं कुमारं अहं जीवमाणं पासिज्जा? ओहयमण जाव झियाइ, तेणं कालेणं० समणे भगवं महावीरे समोसरिते, परिसा निग्गया, ततेणं तीसे कालीए इमीसे कहाए लद्धट्टाए समाणीए अयमेयारूवे अज्झत्थिए जाव समुप्पजित्था-एवं खलु समणे भगवं० पुव्वाणुपुव्वि० इहमागते जाव विहरति तं महाफलं खलु तहारूवाणं जाव विउलस्स अट्टस्स गहणनाए तं गच्छामि णं समणं जाव पज्जुवासामि इमं च णं एयारूवं वागरणं पुच्छिस्सामित्तिकट्टु एवं संपेहेइ ता कोडुंबियपुरिसे सदावेति ता एवं वदासी-खिप्पामेव भो देवाणुप्पिया! धम्मियं जाणप्पवरं जुत्तमेव उवट्टवेह ता जाव पच्चप्पिणंति, ततेणं सा काली देवी ण्हाया कयबलिकम्मा जाव अप्पमहग्घाभरणालंकियसरीरा बहूहिं खुज्जाहिं जाव महत्तरगविंदपरिक्खित्ता अंतोउराओ निग्गच्छइ ता जेणेव बाहिरिया उवट्टाणसाला जेणेव धम्मिए जाणप्पवरे तेणेव उवागच्छइ धम्मियं जाणप्पवरं दुरुहति ता नियगपरियालसंपरिवुडा चंपं नयरीं मज्झमज्झेणं निग्गच्छति जेणेव पुण्णभदे चेइए तेणेव उवागच्छइ ता छत्तादीए जाव धम्मियं जाणप्पवरं ठवेति ता धम्मियाओ जाणप्पवराओ पच्चोरुहति ता बहूहिं जाव खुज्जाहिं जाव विंदपरिक्खित्ता जेणेव समणे भगवं महावीरे तेणेव उवागच्छति ता समणं भगवं० तिकखुत्तो वंदति० ठिया चेव सपरिवारा सुस्ससमाणा नमंसमाणा अभि-मुहा विणएणं पंजलिउडा पज्जुवासति, तते णं समणे भगवं जाव कालीए देवीए तीसे य महतिमहालियाए धम्मकहा भाणियव्वा जाव समणोवासए वा समणोवासिया वा विहरमाणा आणाए आराहए भवति, ततेणं सा काली देवी समणस्स भगवओ० अंतियं धम्मं सोच्चा निसम्म जाव हियया समणं भगवं० तिकखुत्तो जाव एवं वदासी-एवं खलु भंते! मम पुत्ते काले कुमारे तीहिं दंतिसहस्सेहिं जाव रहमुसलसंगमं ओयाते से णं भंते! किं जइस्सति? नो जइस्सति? जाव कालं कुमारं अहं जीवमाणं पासिज्जा?, कालीति समणे भगवं० कालिं देविं एवं वयासी-एवं खलु काली! तव पुत्ते काले कुमारे तीहिं दंतिसहस्सेहिं जाव कूणिणं रत्ना सद्धिं रहमुसलं संगमं संगामेमाणे हयमहियपवरवीरघातितनिवडितचिंधज्झयपडागं निरालोयातो दिसातो करेमाणे चेडगस्स रत्नो सपक्खि सपडिदिसिं रहेणं पडिरहं हव्वमागते, ततेणं से चेडए राया कालं कुमारं एज्जमाणं पासति ता आसुरुत्ते जाव भिसिमिसेमाणे धणुं परामुसति ता उसुं परामुसइ ता वइसाहं ठाणं ठाति ता आययकण्णायतं उसुं करेमाणे कालं कुमारं एगाहच्चं कूडाहच्चं जीवियाओ ववरोवेति, तं कालगते णं काली! काले कुमारे, नो चेव णं तुमं कालं कुमारं जीवमाणं पासिहिसि, तते णं सा काली देवी समणस्स भगवओ० अंतियं एयमट्ठं सोच्चा निसम्म महया पुत्तसोएणं अप्फुन्ना समाणी परसुनियत्ताविव चंपगलता धसत्ति धरणीतलंसि सव्वंगेहिं संनिवडिया, ततेणं सा काली देवी मुहुत्तंतरेणं आसत्था विसत्था समाणी उट्टाए उट्टेति ता समणं भगवं० वंदइ नमंसइ ता एवं वयासी-एवमेयं भंते! तहमेयं भंते! अवितहमेयं भंते! असंदिद्धमेयं भंते! सच्चे णं एसमट्ठे से जहेतं तुम्हे वदहत्तिकट्टु समणं भगवं० वंदइ नमंसइ ता तमेव धम्मियं जाणप्पवरं दुरुहति ता जामेव दिसं पाउब्भूया तामेव दिसं पडिगता । ७। भंते!त्ति भगवं गोयमे जाव वंदति नमंसति ता एवं वयासी-काले णं भंते! कुमारे तीहिं दंतिसहस्सेहिं जाव रहमुसलं संगमं संगामेमाणे चेडएणं रत्ना एगाहच्चं कूडाहच्चं जीवियाओ ववरोविते समाणे कालमासे कालं किच्चा कहिं गते कहिं उववन्ने?, गोयमाति! समणे० भगवं गोयमं एवं वदासी-एवं खलु गो०! काले कुमारे तीहिं दंतिसहस्सेहिं जाव जीवियाओ ववरोविते समाणे कालमासे कालं किच्चा चउत्थीए पंकप्पभाए पुढवीए हेमाभे नरगे दससागरोवमठिइएसु नेरइएसु नेरइयत्ताए उववन्ने । ८। काले णं भंते! कुमारे केरिसएहिं आरंभेहिं केरिसएहिं (समारंभेहिं केरिसएहिं) आरं-भसमारंभेहिं केरिसएहिं भोगेहिं केरिसएहिं संभोगेहिं केरिसएहिं भोगसंभोगेहिं केरिसेण वा असुभकडकम्मपभारेणं कालमासे कालं किच्चा चउत्थीए पंकप्पभाए पुढवीए जाव नेरइयत्ताए उववन्ने?, एवं खलु गो०! तेणं कालेणं० रायगिहे नामं नयरे होत्था रिद्धत्थिमियसमिद्धे०, तत्थ णं रायगिहे नयरे सेणिए नामं राया होत्था महया०, तस्स णं सेणियस्स रत्नो नंदा नामं देवी होत्था सोमाला जाव विहरति, तस्स णं सेणियस्स रत्नो नंदाए देवीए अत्तए अभए नामं कुमारे होत्था सोमाले जाव सुरूवे साम० जहा चित्तो जाव रज्जधुराचित्तए यावि होत्था, तस्स णं सेणियस्स रत्नो चेळुणा नामं देवी होत्था सोमाला जाव विहरइ, तते णं सा चिळुणा देवी अन्नया कयाई तंसिं तारि-सयंसि वासघरंसि जाव सीहं सुमिणे पासित्ताणं पडिबुद्धा जहा पभावती जाव सुमिणपाढगा पडिविसज्जिता जाव चिळुणा से वयणं पडिच्छित्ता जेणेव सए भवणे तेणेव अणुपविट्ठा । ९। तते णं तीसे चेळुणाए देवीए अन्नया कयाई तिण्हं मासाणं बहुपडिपुण्णाणं अयमेयारूवे दोहले पाउब्भूए-धन्नाओ णं ताओ अम्मयाओ जाव जम्मजीवियफले जाओ णं सेणियस्स रत्नो उदरवलीमंसेहिं सोल्लेहि य तल्लिएहि य भज्जितेहि य सुरं च जाव पसन्नं च आसाएमाणीओ जाव परिभाएमाणीओ दोहलं पविणेंति, तते णं सा चेळुणा देवी तंसिं दोहलंसि अविणिज्जमाणंसि सुक्का भुक्खा निम्मंसा ओलुग्गा ओलुग्गसरीरा नित्तेया दीणविमणवयणा पंडुल्लइयमुही ओमंथियनयणवयणकमला जहोचियं पुप्फ-वत्थगंधमल्लालंकारं अपरिभुंजमाणी करतलमलियव्व कमलमाला ओहतमणसंकप्पा जाव झियायति, ततेणं तीसे चेळुणाए देवीए अंगपडियारियातो चेळुणं देविं सुक्कं भुक्खं जाव झियायमाणिं पासति ता जेणेव सेणिए राया तेणेव उवागच्छंति ता जाव कट्टु सेणियं रायं एवं वयासी-एवं खलु सामी! चेळुणा देवी न याणामो केणई कारणेणं सुक्का भुक्खा जाव झियायति, तते णं से सेणिए राया तासिं अंगपडियारियाणं अंतिए एयमट्ठं सोच्चा निसम्म तहेव संभंते समाणे जेणेव चेळुणा देवी तेणेव उवागच्छइ ता चिळुणं देविं सुक्कं भुक्खं जाव झियायमाणिं पासित्ता एवं वयासी-किन्नं तुमं देवाणुप्पिए! सुक्का भुक्खा जाव झियायसि?, तते णं सा चेळुणा देवी सेणियस्स रण्णो एय-मट्ठं णो आढाति णो परिजाणाति तुसिणीया संचिट्ठति, तते णं से सेणिए राया चेळुणं देविं दोच्चंपि तच्चंपि एवं वयासी-किं णं अहं देवाणुप्पिए! एयमट्ठस्स नो अरिहे सवणयाए जं णं तुमं अयमट्ठं रहस्सीकरेसि?, तते णं सा चेळुणा

८९४ निरयावल्याद्युपांगपंचकं, निरयावल्याद्युपांग

देवी सेणिएणं रक्षा दोषं पि तच्चं पि एवं वुत्ता समाणी सेणियं रायं एवं वयासी-णत्थि णं सामी ! से केति अट्टे जस्स णं तुम्हे अणरिहा सवणयाए, नो चेव णं इमस्स अट्टस्स सवणयाए, एवं खलु सामी ! ममं तस्स ओरालस्स जाव महासुमिणस्स तिण्हं मासाणं बहुपडिपुण्णाणं अयमेयारूवे दोहले पाउम्भूए-धन्नातो णं तातो अम्मयाओ जाव जाओ णं तुम्हं उदरवलिमंसेहिं सोल्लिएहि य जाव दोहलं विणेंति, तते णं अहं सामी ! तंसिं दोहलंसि अविणिज्जमाणंसि सुक्का भुक्खा जाव झियायामि, तते णं से सेणिए राया चेळणं देविं एवं वदासी-मा णं तुमं देवाणुप्पिए ! ओहय जाव झियायाहि, अहं णं तहा घत्तिस्सामि जहा णं तव दोहलस्स संपत्ती भविस्सतीतिकट्टु चिळणं देविं ताहिं इट्ठाहिं कंताहिं पियाहिं मणुक्काहिं मणामाहिं ओरालाहिं कल्लाणाहिं सिवाहिं धन्नाहिं मंगल्लाहिं मियमधुरसस्सिरीयाहिं वग्गूहिं समासासेति, चिळणाए देवीए अंतियातो पडिनिक्खमति ता जेणेव बाहिरिया उवट्ठाणसाला जेणेव सीहासणे तेणेव उवागच्छइ ता सीहासणवरंसि पुरत्थाभिमुहे निसीयति, तस्स दोहलस्स संपत्तिनिमित्तं बहूहिं आएहिं उवाएहि य उप्पत्तियाए य वेणइयाए य कम्मियाहि य पारिणामियाहि य परिणामेमाणे २ तस्स दोहलस्स आयं वा उवायं वा ठिइ वा अविंदमाणे ओहयमणसंकप्पे जाव झियायति, इमे य णं अभए कुमारे ण्हाए जाव सरीरे सयाओ गिहाओ पडिनिक्खमति ता जेणेव बाहिरिया उवट्ठाणसाला जेणेव सेणिए राया तेणेव उवागच्छति ता सेणियं रायं ओहय जाव झियायमाणं पासति ता एवं वदासी-अन्नया णं तातो ! तुम्हे ममं पासित्ता हट्टजावहियया भवह, किन्नं तातो ! अज्ज तुम्हे ओहय जाव झियायह ?, तं जइ णं अहं तातो ! एयस्सट्टस्स अरिहे सवणयाए तो णं तुम्हे मम एयमट्टं जहाभूतमवितहं असंदिद्धं परिकहेह जे(जा)णं अहं तस्स अट्टस्स अंतगमणं करेमि, तते णं से सेणिए राया अभयं कुमारं एवं वदासी-णत्थि णं पुत्ता ! से केइ अट्टे जस्स णं तुमं अणरिहे सवणयाए, एवं खलु पुत्ता ! तव चुल्ल-माउयाए चेळणाए देवीए तस्स ओरालस्स जाव महासुमिणस्स तिण्हं मासाणं बहुपडिपुण्णाणं जाव जाओ णं मम उदरवलीमंसेहिं सोल्लेहि य जाव दोहलं विणेंति, तते णं सा चिळणा देवी तंसिं दोहलंसि अविणिज्जमाणंसि सुक्का जाव झियाति, तते णं अहं पुत्ता ! तस्स दोहलस्स संपत्तिनिमित्तं बहूहिं आएहि य जाव ठितिं वा अविंदमाणे ओहय जाव झियामि, तए णं से अभए कुमारे सेणियं रायं एवं वदासी-मा णं तातो ! तुम्हे ओहय जाव झियायह अहं णं तहा ज(घ)त्तिहामि जहा णं मम चुल्लमाउयाए चिळणाए देवीए तस्स दोहलस्स संपत्ती भविस्सतीतिकट्टु सेणियं रायं ताहिं इट्ठाहिं जाव वग्गूहिं समासासेति ता जेणेव सए गिहे तेणेव उवागच्छइ ता अब्भितरए रहस्सि-तए ठाणिजे पुरिसे सदावेति ता एवं वयासी-गच्छह णं तुम्हे देवाणुप्पिया ! सूणातो अल्लं मंसं रुहिरं बत्थिपुडगं च गिण्हह, तते णं ते ठाणिज्जा पुरिसा अभएणं कुमारेणं एवं वुत्ता समाणा हट्ट० करतल जाव पडिसुणेत्ता अभ-यस्स कुमारस्स अंतियाओ पडिनिक्खमंति ता जेणेव सूणा तेणेव उवागच्छन्ति ता अल्लमंसं रुहिरं बत्थिपुडगं च गिण्हंति ता जेणेव अभए कुमारे तेणेव उवागच्छंति ता करतल० तं अल्लमंसं रुहिरं बत्थिपुडगं च उवणेंति, तते णं से अभए कुमारे तं अल्लमंसं रुहिरं कप्पणिकप्पियं करेति ता जेणेव सेणिए राया तेणेव उवा० ता सेणियं रायं रहस्सिगयं सयणिज्जंसि उत्ताणयं नुवज्जावेति ता सेणियस्स उदरवलीसु तं अल्लमंसं रुहिरं विरवेति ता बत्थिपुडएणं वेदेति ता सर्वतीकरणं करेति ता चेळणं देविं उप्पिं पासादे अवलोयणवरगयं ठवावेति ता चेळणाए देवीए अहे सपक्खि सपडिदिसिं सेणियं रायं सयणिज्जंसि उत्ताणगं निवज्जावेति, सेणियस्स रन्नो उदरवलिमंसाइं कप्पणिकप्पियाइं करेति ता सेयभायणंसि पक्खिवति, तते णं से सेणिए राया अलियमुच्छियं करेति ता मुहुत्तंतरेणं अन्नमन्नेणं सद्धिं संलवमाणे चिट्ठति, तते णं से अभयकुमारे सेणियस्स रन्नो उदरवलिमंसाइं गिण्हेति ता जेणेव चिळणा देवी तेणेव उवागच्छइ ता चेळणाए देवीए उवणेति, तते णं सा चिळणा सेणियस्स रन्नो तेहिं उदरवलिमंसेहिं सोल्लेहिं जाव दोहलं विणेति, तते णं सा चिळणा देवी संपुण्णदोहला एवं संमाणियदोहला विच्छिन्नदोहला तं गम्भं सुहंसुहेणं परिवहति । १० । तते णं तीसे चेळणाए अन्नया कयाई पुवरत्तावरत्तकालसमयंसि अयमेयारूवे जाव समुप्पज्जित्था-जइ ताव इमेणं दारएणं गम्भगएणं चेव पिउणो उदरवलिमंसाणि खाइयाणि तं सेयं खलु मम एयं गम्भं साडित्तए वा पाडित्तए वा गालित्तए वा विद्धंसित्तए वा, एवं संपेहेति ता तं गम्भं बहूहिं गम्भसाडणेहि य गम्भपाडणेहि य गम्भगालणेहि य गम्भविद्धंसणेहि य इच्छति साडित्तए वा पाडित्तए वा गालित्तए वा विद्धंसित्तए वा, नो चेव णं से गम्भे सडति वा पडति वा गलति वा विद्धंसति वा, तते णं सा चिळणा देवी तं गम्भं जाहे नो संचाएति बहूहिं गम्भसाडणेहि य जाव विद्धंसित्तए वा ताहे संता तंता परितंता निव्विन्ना समाणी अकामिया अवसवसा अट्टवसट्टदुहट्टा तं गम्भं परिवहति । ११ । तते णं सा चिळणा देवी नवण्हं मासाणं बहुपडिपुण्णाणं जाव सोमालं सुरूवं दारयं पयाया, तते णं तीसे चेळणाए देवीए इमे एतारूवे जाव समुप्पज्जित्था-जइ ताव इमेणं दारएणं गम्भगएणं चेव पिउणो उदरवलिमंसाइं खाइयाइं तं न नज्जइ णं एस दारए संवड्डमाणे अम्हं कुलस्स अंतकरे भविस्सति तं सेयं खलु अम्हं एयं दारगं एगंते उकुरुडियाए उज्झावित्तए, एवं संपेहेति ता दासचेडिं सदावेति ता एवं वयासी-गच्छह णं तुमं देवाणुप्पिए ! एयं दारगं एगंते उकुरुडियाए उज्झाहि, तते णं सा दासचेडी चेळणाए देवीए एवं वुत्ता समाणी करतल जाव कट्टु चिळणाए देवीए एतमट्टं विणएणं पडिसुणेति ता तं दारगं करतलपुडेणं गिण्हेइ ता जेणेव असोगव-णिया तेणेव उवा० ता तं दारगं एगंते उकुरुडियाए उज्झति, तते णं तेणं दारएणं एगंते उकुरुडियाए उज्झितेणं समाणेणं सा असोगवणिया उज्जोविता यावि होत्था, तते णं से सेणिए राया इमीसे कहाए लद्धट्टे समाणे जेणेव असोगवणिया तेणेव उवा० ता तं दारगं एगंते उकुरुडियाए उज्झियं पासेति ता आसुरुत्ते जाव मिसिमिसेमाणे तं दारगं करतलपुडेणं गिण्हति ता जेणेव चिळणा देवी तेणेव उवा० ता चेळणं देविं उच्चावयाहिं आओसणाहिं आओ-सति उच्चावयाहिं निब्भच्छणाहिं निब्भच्छेति एवं उद्धंसणाहिं उद्धंसेति ता एवं वयासी-कीस णं तुमं मम पुत्तं एगंते उकुरुडियाए उज्झावेसित्तिकट्टु चेळणं देविं उच्चावयसवहसावितं करेति ता एवं वयासी-तुमं णं देवाणुप्पिए ! एयं दारगं अणुपुब्बेणं सारक्खमाणी संगोवेमाणी संवड्डेहि, तते णं सा चेळणा देवी सेणिएणं रक्षा एवं वुत्ता समाणी लज्जिया विलिया विड्डा करतलपरिग्गाहियं० सेणियस्स रन्नो विणएणं एयमट्टं पडिसुणेति ता तं दारगं अणु-पुब्बेणं सारक्खमाणी संगोवेमाणी संवड्डेति । १२ । तते णं तस्स दारगस्स एगंते उकुरुडियाए उज्झिज्जमाणस्स अगंगुलियाए कुक्कुडपिच्छएणं दूमिया यावि होत्था, अभिक्खणं २ पूयं सोणियं च अभिनिस्सवेति, तते णं से

दारए वेदणाभिभूए समाणे महता २ सहेणं आरसति, तते णं सेणिए राया तस्स दारगस्स आरसितसइं सोच्चा निसम्म जेणेव से दारए तेणेव उवा० ता तं दारगं करतलपुडेणं गिण्हइ ता तं अग्गंगुलियं आसयंसि पक्खिवति ता पूई च सोणियं च आसएणं आमुसति, तते णं से दारए निबुए निवेदणे तुसिणीए संचिट्टइ, जाहेविय णं से दारए वेदणाए अभिभूते समाणे महता २ सहेणं आरसति ताहेविय णं सेणिए राया जेणेव से दारए तेणेव उवा० ता तं दारगं करतलपुडेणं गिण्हति तं चेव जाव निवेयणे तुसिणीए संचिट्टइ, तते णं तस्स दारगस्स अम्मापियरो ततिए दिवसे चंदसूरदंसणियं करंति जाव संपत्ते बारसाहे दिवसे अयमेयारूवं गुणं गुणनिप्फन्नं नामधिज्जं करंति-जहा णं अम्हं इमस्स दारगस्स एगंते उकुरुडियाए उज्झिज्जमाणस्स अग्गंगुलिया कुकुडपिच्छएणं दूमिया तं होउ णं अम्हं इमस्स दारगस्स नामधेज्जं कूणिए, तते णं तस्स दारगस्स अम्मापियरो नामधिज्जं करंति-कूणियत्ति २, तते णं तस्स कूणियस्स आणुपुत्रेणं ठितिवडियं च जहा मेहस्स जाव उप्पि पासायवरगए विहरति, अट्टओ दाओ । १३ । तते णं तस्स कूणियस्स कुमारस्स अन्नदा पुव्वरत्ता जाव समुप्पज्जित्था-एवं खलु अहं सेणियस्स रन्नो वाघाएणं नो संचाएमि सयमेव रज्जसिरिं करेमाणे पालेमाणे विहरित्तए तं सेयं खलु मम सेणियं रायं नियलबंधणं करेत्ता अप्पाणं महता २ रायाभिसेएणं अभिसिंचावित्तएत्तिकट्टु एवं संपेहेति ता सेणियस्स रन्नो अंतराणि य छिड्डाणि य विवराणि य पडिजागरमाणे विहरति, तते णं से कूणिए कुमारे सेणियस्स रन्नो अंतरं वा जाव मम्मं वा अलभमाणे अन्नदा कयाई कालादीए दस कुमारे नियघरे सदावेति ता एवं वदासी-एवं खलु देवाणुप्पिया ! अम्हे सेणियस्स रन्नो वाघाएणं नो संचाएमो सयमेव रज्जसिरिं करेमाणा पालेमाणा विहरित्तए तं सेयं खलु देवाणुप्पिया ! अम्हं सेणियं रायं नियलबंधणं करेत्ता रज्जं च रट्ठं च बलं च वाहणं च कोसं च कोट्टागारं च जणवयं च एक्कारसभाए विरिंचित्ता सयमेव रज्जसिरिं करेमाणे पालेमाणे जाव विहरित्तए, तते णं ते कालादीया दस कुमारा कूणियस्स कुमारस्स एयमट्ठं विणएणं पडिसुणेंति, तते णं से कूणिए कुमारे अन्नदा कदाई सेणियस्स रन्नो अंतरं जाणति ता सेणियं रायं नियलबंधणं करेति ता अप्पाणं महता २ रायाभिसेएणं अभिसिंचावेति, तते णं से कूणिए कुमारे राजा जाते महता०, तते णं से कूणिए राया अन्नदा कदाई ण्हाए जाव सत्तालंकारविभूसिए चेल्हणाए देवीए पायवंदए हव्वमागच्छति । १४ । तते णं से कूणिए राया चेल्हणं देविं ओहय जाव झियायमाणिं पासति ता चेल्हणाए देवीए पायग्गहणं करेति ता चेल्हणं देविं एवं वदासी-किं णं अम्मो ! तुम्हं न तुट्ठी वा न उस्सए(वे) वा न हरिसे वा नाणंदे वा ? जं णं अहं सयमेव रज्जसिरिं जाव विहरामि, तते णं सा चेल्हणा देवी कूणियं रायं एवं वयासी-कहणं पुत्ता ! ममं तुट्ठी वा उस्सए वा हरिसे वा आणंदे वा भविस्सति ? जं णं तुमं सेणियं रायं पियं देवयं गुरुं जणगं अच्चंतनेहाणुरा-गरत्तं नियलबंधणं करित्ता अप्पाणं महता २ रायाभिसेएणं अभिसिंचावेसि, तते णं से कूणिए राया चिल्हणं देविं एवं वदासी-घातेउकामे णं अम्मो ! ममं सेणिए राया, एवं मारेतुं बंधितुं णिच्छुभिउकामए णं अम्मो ! ममं सेणिए राया, तं कहन्नं अम्मो ! ममं सेणिए राया अच्चंतनेहाणुरागरत्ते ?, तते णं सा चेल्हणा देवी कूणियं कुमारं एवं वदासी-एवं खलु पुत्ता ! तुमंसि ममं गब्भे आहूते समाणे तिण्हं मासाणं बहुपडिपुच्चाणं ममं अयमेयारूवे दोहले पाउब्भूते-धन्नातो णं तातो अम्मयातो जाव अंगपडिचारियाओ निरवसेसं भाणियव्वं जाव जाहेविय णं तुमं वेयणाए अभिभूते महता जाव तुसिणीए संचिट्टसि, एवं खलु तव पुत्ता ! सेणिए राया अच्चंतनेहाणुरागरत्ते, तते णं से कूणिए राया चेल्हणाए देवीए अंतिए एयमट्ठं सोच्चा निसम्म चिल्हणं देविं एवं वदासी-दुट्ठु णं अम्मो ! मए कयं सेणियं रायं पियं देवयं गुरुं जणगं अच्चंतनेहाणुरागरत्तं नियलबंधणं करंतेणं, तं गच्छामि णं सेणियस्स रन्नो सयमेव नियलाणि छिंदामित्तिकट्टु परसुहत्थगते जेणेव चारगसाला तेणेव पहारित्थ गमणाए, तते णं सेणिए राया कूणियं कुमारं परसुहत्थगयं एज्जमाणं पासति ता एवं वयासी-एस णं कूणिए कुमारे अपत्थियपत्थए जाव सिरिहिरिपरिवज्जिए परसु-हत्थगए इह हव्वमागच्छति तं न नज्जइ णं ममं केणई कुमारेणं मारिस्सतीतिकट्टु भीए जाव संजायभए तालपुडगं विसं आसगंसि परिक्खवइ, तते णं से सेणिए राया तालपुडगविसे आसगंसि पक्खित्ते समाणे मुहुत्तंतरेणं परिणम-माणंसि निप्पाणे निच्चेट्टे जीवविप्पजडे ओइन्ने, तते णं से कूणिए कुमारे जेणेव चारगसाला तेणेव उवागए, सेणियं रायं निप्पाणं निच्चेट्टं जीवविप्पजडं ओइन्नं पासति ता महता पितिसोएणं अप्फुण्णे समाणे परसुनियत्तेवि चंपग-वरपादवे धसत्ति धरणीतलंसि सव्वंगेहिं संनिवडिए, तते णं से कूणिए कुमारे मुहुत्तंतरेणं आसत्थे समाणे रोयमाणे कंदमाणे सोयमाणे विलवमाणे एवं वदासी-अहो णं मए अधच्चेणं अपुच्चेणं अकयपुच्चेणं दुट्ठु कयं सेणियं रायं पियं देवयं० अच्चंतनेहाणुरागरत्तं नियलबंधणं करंतेणं मम मूलागं चेव णं सेणिए राया कालगतेत्तिकट्टु ईसर० जाव संधिवाल सद्धिं संपरिवुडे रोयमाणे० महया इडिढसक्कारसमुदएणं सेणियस्स रन्नो नीहरणं करेति, बहूइं लोइयाई मय-किच्चाइं करेति, तते णं से कूणिए कुमारे एतेणं महया मणोमाणसिएणं दुक्खेणं अभिभूते समाणे अन्नदा कदाई अंतेउरपरियालसंपरिवुडे सभंडमत्तोवकरणमाताए रायगिहातो पडिनिक्खमति ता जेणेव चंपा नगरी तेणेव उवाग-च्छइ, तत्थवि णं विपुलभोगसमितिसमन्नागए काले णं अप्पसोए जाए यावि होत्था । १५ । तते णं से कूणिए राया अन्नया कयाई कालादीए दस कुमारे सदावेति ता रज्जं च जाव जणवयं च एक्कारसभाए विरिंचति ता सयमेव रज्जसिरिं करेमाणे पालेमाणे विहरति । १६ । तत्थ णं चंपाए नगरीए सेणियस्स रन्नो पुत्ते चेल्हणाए देवीए अत्तए कूणियस्स रन्नो सहोयरे कणीयसे भाया वेहल्ले नामं कुमारे होत्था सोमाले जाव सुरूवे, तते णं तस्स वेहल्लस्स कुमारस्स सेणिएणं रन्ना जीवंतएणं चेव सेयणए गंधहत्थी अट्टारसव्वंके य हारे पुव्वदिन्ने, तए णं से वेहल्ले कुमारे सेयणएणं गंधहत्थिणा अंतेउरपरियालसंपरिवुडे चंपं नगरिं मज्झंमज्जेणं निग्गच्छइ ता अभिक्खणं २ गंगं महानइं मज्ज-णयं ओयरइ, तते णं से सेयणए गंधहत्थी देवीओ सोंडाए गहाय ताओ उदयत्तइ ता अप्पेगइयाओ पुट्टे ठवेति अप्पेगइयाओ खंधे ठवेति एवं अप्पे० कुंभे ठवेति अप्पे० सीसे ठवेति अप्पे० दंतमुसले ठवेति अप्पे० सोंडाए गहाय उड्डं वेहासं उड्डिहइ अप्पे० सोंडागयाओ अंदोलावेति अप्पे० दंतंतरेसु नीणेति अप्पे० सीभरेणं ण्हाणेति अप्पे० अणेगेहिं कीलावणेहिं कीलावेति, तते णं चंपाए नयरीए सिंघाडगतिगचउक्कचच्चरमहापहपहेसु बहुजणो अन्नमन्नस्स एवमाइक्खइ जाव परूवेति-एवं खलु देवाणुप्पिया ! वेहल्ले कुमारे सेयणएणं गंधहत्थिणा अंतेउरं तं चेव जाव णेगेहिं कीलावणेहिं कीलावेति तं एस णं वेहल्ले कुमारे रज्जसिरिफलं पच्चणुच्चवमाणे विहरति, नो कूणिए राया, तते णं तीसे पउमावईए देवीए इमीसे कहाए लड्डाए समाणीते अयमेयारूवे जाव समुप्पज्जित्था-एवं खलु वेहल्ले कुमारे सेयणएणं गंधहत्थिणा जाव अणेगेहिं कीलावणेहिं कीलावेति तं एस णं वेहल्ले कुमारे रज्जसिरिफलं (२२४)

८९६ निरयावल्यापुपांगपंचकं - निरयावल्यापुपांग

पञ्चणुम्भवमाणे विहरति, नो कोणिए राया, तं किं अम्हं रज्जेण वा जाव जणवएण वा जइ णं अम्हं सेयणगे गंधहत्थी नत्थि ? तं सेयं खलु ममं कूणियं रायं एयमट्ठं विन्नवित्तएत्तिकट्ठु एवं संपेहेति त्ता जेणेव कूणिए राया तेणेव उवा० त्ता करतल जाव एवं वयासी-एवं खलु सामी ! वेहल्ले कुमारे सेयणएण गंधहत्थिणा जाव अणेगेहिं कीलावणएहिं कीलावेति, तं किण्णं सामी ! अम्हं रज्जेण वा जाव जणवएण वा जति णं अम्हं सेयणए गंधहत्थी नत्थि ? तए णं से कूणिए राया पउमावईए देवीए एयमट्ठं नो आढाति नो परिजाणति तुसिणीए संचिद्वति, तते णं सा पउमावई देवी अभिक्खणं २ कूणियं रायं एयमट्ठं विन्नवेइ, तते णं से कूणिए राया पउमावईए देवीए अभिक्खणं २ एयमट्ठं विन्नविज्जमाणे अन्नया कयाई वेहल्लं कुमारं सदावेति त्ता सेयणगं गंधहत्थि अट्टारसवंकं च हारं जायति, तते णं से वेहल्ले कुमारे कूणियं रायं एवं वयासी-एवं खलु सामी ! सेणिएणं रण्णा जीवतेणं चेव सेयणए गंधहत्थी अट्टारसवंके य हारे दिन्ने, तं जइ णं सामी ! तुम्भे ममं रज्जस्स य जणवयस्स य अद्धं भागं दलयह तो णं अहं तुम्भं सेयणयं गंधहत्थि अट्टारसवंकं च हारं दलयामि, तते णं से कूणिए राया वेहल्लस्स कुमारस्स एयमट्ठं नो आढाति नो परिजाणाइ, अभिक्खणं २ सेयणगं गंधहत्थि अट्टारसवंकं च हारं जायति, तए णं तस्स वेहल्लस्स कुमारस्स कूणिएणं रन्ना अभिक्खणं २ सेयणगं गंधहत्थि अट्टारसवंकं च हारं जायमाणस्स एवं संकप्पे समुप्पज्जित्था-अक्खिविउका-मे णं गिण्हिउकामे णं उद्दालेउकामे णं ममं कूणिए राया सेयणगं गंधहत्थि अट्टारसवंकं च हारं तं जावताव ममं कूणिए राया सेयणगं गंधहत्थि अट्टारसवंकं च हारं न उद्दालेइ ताव मे सेयणगं गंधहत्थि अट्टारसवंकं च हारं गहाय अंतेउरपरियालसंपरिवुडस्स सभंडमत्तोवकरणमायाए चंपातो नयरीतो पडिनिक्खमित्ता वेसालीए नयरीए अज्जगं चेडयं रायं उवसंपज्जित्ताणं विहरित्तए, एवं संपेहेति त्ता कूणियस्स रन्नो अंतराणि जाव पडिजागरमाणे २ विहरति, तते णं से वेहल्ले कुमारे अन्नदा कदाई कूणियस्स रन्नो अंतरं जाणति त्ता सेयणगं गंधहत्थि अट्टारसवंकं च हारं गहाय अंतेउरपरियालसंपरिवुडे सभंडमत्तोवकरणमायाए चंपाओ नयरीतो पडिनिक्खमति त्ता जेणेव वेसाला नगरी तेणेव उवागच्छति वेसालाए नगरीए अज्जगं चेडयं रायं उवसंपज्जित्ताणं विहरति, तते णं से कूणिए राया इमीसे कहाए लद्धट्ठे समाणे एवं खलु वेहल्ले कुमारे ममं असंविदितेणं सेयणगं गंधहत्थि अट्टारसवंकं च हारं गहाय अंते-उरपरियालसंपरिवुडे जाव अज्जयं चेडयं रायं उवसंपज्जित्ताणं विहरति, तं सेयं खलु ममं सेयणगं गंधहत्थि अट्टारसवंकं च हारं० (पडुच्च) दूतं पेसित्तए, एवं संपेहेति त्ता दूतं सदावेति त्ता एवं वयासी-गच्छह णं तुमं देवाणुप्पिया ! वेसालिं नगरिं, तत्थ णं तुमं ममं अज्जगं चेडगं रायं करतल० वद्धावेत्ता एवं वयासी-एवं खलु सामी ! कूणिए राया विन्नवेति-एस णं वेहल्ले कुमारे कूणियस्स रन्नो असंविदितेणं सेयणगं अट्टारसवंकं हारं च गहाय हवमागते, तए णं तुम्भे सामी ! कूणियं रायं अणुगिण्हमाणा सेअणगं अट्टारसवंकं च हारं कूणियस्स रन्नो पच्चप्पिणह, वेहल्लं कुमारं च पेसेह, तते णं से दूए कूणिएण रण्णा एवं वुत्ते समाणे करतल० जाव पडिसुणति त्ता जेणेव सते गिहे तेणेव उवा० त्ता जहेव चित्ते तहेव जाव चेडयं रायं जएणं विजएणं वद्धावइ त्ता एवं वयासी-एवं खलु सामी ! कूणिए राया विन्नवेइ-एस णं वेहल्ले कुमारे तहेव भाणियव्वं जाव वेहल्लं कुमारं पेसेह, तते णं से चेडए राया तं दूयं एवं वयासी-जह चेव णं देवाणुप्पिया ! कूणिए राया सेणियस्स रन्नो पुत्ते चेडणाए देवीए अत्तए ममं नत्तुए तहेव णं वेहल्लेवि कुमारे सेणियस्स रन्नो पुत्ते चेडणाए देवीए अत्तए ममं नत्तुए, सेणिएणं रन्ना जीवतेणं चेव वेहल्लस्स कुमारस्स सेयणगे गंधहत्थी अट्टारसवंके य हारे पुबविदिन्ने, तं जइ णं कूणिए राया वेहल्लस्स रज्जस्स य जणवयस्स य अद्धं दलयति तो णं अहं सेयणगं अट्टारसवंकं हारं च कूणियस्स रन्नो पच्चप्पिणामि, वेहल्लं च कुमारं पेसेमि, तं दूयं सक्कारेति संमाणेति त्ता पडिविसज्जेति, तते णं से दूते चेडएणं रन्ना पडिविसज्जिए समाणे जेणेव चाउग्घंटे आसरहे तेणेव उवागच्छइ त्ता चाउग्घंटे आसरहं दुरुहति, वेसालिं नगरिं मज्झमज्जेणं निग्गच्छइ त्ता सुभेहिं वसहीहिं पायरासेहिं जाव वद्धावित्ता एवं वयासी-एवं खलु सामी ! चेडए राया आणवेति-जह चेव णं कूणिए राया सेणियस्स रन्नो पुत्ते चेडणाए देवीए अत्तए ममं नत्तुए तं चेव भाणियव्वं जाव वेहल्लं च कुमारं पेसेमि, तं न देति णं सामी ! चेडए राया सेयणगं अट्टारसवंकं हारं च वेहल्लं च नो पेसेति, तते णं से कूणिए राया दुच्चंपि दूयं सदावेइ त्ता एवं वयासी-गच्छह णं तुमं देवाणु० ! वेसालिं नगरिं तत्थ णं तुमं ममं अज्जगं चेडगं रायं जाव एवं वयासी-एवं खलु सामी ! कूणिए राया विन्नवेइ-जाणि काणि रयणाणि समुप्पज्जंति सव्वाणि ताणि रायकुलगामीणि, सेणियस्स रन्नो रज्जसिरिं करमाणस्स पालेमाणस्स दुवे रयणा समुप्पन्ना, तं०-सेयणए गंधहत्थी अट्टारसवंके य हारे, तन्नं तुम्भे सामी ! रायकुलप-रंपरागयं ठिडयं अलोवेमाणा सेयणगं गंधहत्थि अट्टारसवंकं च हारं कूणियस्स रन्नो पच्चप्पिणह, वेहल्लं कुमारं च पेसेह, तते णं से दूते कूणियस्स रन्नो तहेव जाव वद्धावित्ता एवं वयासी-एवं खलु सामी ! कूणिए राया विन्नवेइ-जाणि काणि जाव वेहल्लं कुमारं पेसेह, तते णं से चेडए राया तं दूयं एवं वयासी-जह चेव णं देवाणुप्पिया ! कूणिए राया सेणियस्स रन्नो पुत्ते चिडणाए देवीए अत्तए जहा पढमं जाव वेहल्लं च कुमारं पेसेमि, तं दूतं सक्कारेति संमाणेति त्ता पडिविसज्जेति, तते णं से दूते जाव कूणियस्स रन्नो० वद्धावित्ता एवं वयासी-चेडए राया आणवेति-जह चेव णं देवाणुप्पिया ! कूणिए राया सेणियस्स रन्नो पुत्ते चिडणाए देवीए अत्तए जाव वेहल्लं च कुमारं पेसेमि, तं न देति णं सामी ! चेडए राया सेयणगं गंधहत्थि अट्टारसवंकं च हारं वेहल्लं च कुमारं नो पेसेति, तते णं से कूणिए राया तस्स दूयस्स अंतिए एयमट्ठं सोच्चा निसम्म आसुरुत्ते जाव मिसिमिसेमाणे तच्च दूतं सदावेति त्ता एवं वयासी-गच्छह णं तुमं देवाणुप्पिया ! वेसालीए नयरीए चेडगस्स रन्नो वामेणं पादेणं पायपीढं अक्कमाहि त्ता कुंतगणेणं लेहं पणामेहि त्ता आसुरुत्ते जाव मिसिमिसेमाणे तिवलियं भिउडिं निडाले साहट्ठु चेडगं रायं एवं वयासी-हंभो चेडग-राया ! अपत्थियपत्थिया ! दुरंत जाव परिवज्जिता एस णं कूणिए राया आणवेइ-पच्चप्पिणाहि णं कूणियस्स रन्नो सेयणगं अट्टारसवंकं च हारं वेहल्लं च कुमारं पेसेहि अहव जुद्धसज्जो चिट्ठाहि, एस कूणिए राया सबले सवाहणे सखं-धावारे जुद्धसज्जे इह हवमागच्छति, तते णं से दूते करतल तहेव जाव जेणेव चेडए राया तेणेव उवा० त्ता करतल० जाव वद्धा० त्ता एवं वयासी-एस णं सामी ! ममं विणयपडिवत्ती, इयाणि कूणियस्स रन्नो आणत्तित्ति चेडगस्स रन्नो वामेणं पाएणं पादपीढं अक्कमति त्ता आसुरुत्ते कुंतगणेणं लेहं पणामेति तं चेव सबलखंधावारे इह हवमागच्छति, तते णं से चेडए राया तस्स दूयस्स अंतिए एयमट्ठं सोच्चा निसम्म आसुरुत्ते जाव साहट्ठु एवं वयासी-न

८९७ निरयावल्याद्युपांगपंचकं, निरयावल्याद्युपांगपंचकं

अपिणामि णं कूणियस्स रन्नो सेयणगं गंधहत्थि अट्टारसवंकं च हारं, वेहल्लं च कुमारं नो पेसेमि, एस णं जुद्धसज्जे चिट्ठामि, तं दूयं असक्कारिय असंमाणिय अवहारेणं निच्छुहावेइ । १७। तते णं से कूणिए राया तस्स दूतस्स अंतिए एयम सोच्चा णिसम्म आसुरुत्ते कालादीए दस कुमारे सदावेइ ता एवं वयासी-एवं खलु देवाणुप्पिया ! वेहल्ले कुमारे मम असंविदितेणं सेयणगं गंधहत्थि अट्टारसवंकं च हारं अंतेउरं सभंडं च गहाय चंपातो निक्खमति ता वेसालिं० अज्ज चेडगं रायं उवसंपज्जित्ताणं विहरति, तते णं मए सेयणगस्स गंधहत्थिस्स अट्टारसवंकस्स हारस्स य अट्टाए दूया पेसिया, ते य चेडएण रण्णा इमेणं कारणेणं पडिसेहिता अदुत्तरं च णं मम तच्च दूतं असक्कारितं० अवहारेणं निच्छुहावेति तं से खलु देवाणुप्पिया ! अम्हं चेडगस्स रन्नो जत्तं गिण्हित्तए, तए णं कालाईया दस कुमारा कूणियस्स रन्नो एयमट्ठं विणएणं पडिसुणेंति, तते णं से कूणिए राया कालादीते दस कुमारे एवं वयासी-गच्छह णं तुब्भे देवाणुप्पिया सएसु २ रज्जेसु पत्तेयं २ ण्हाया जाव पायच्छित्ता हत्थिखंधवरगया पत्तेयं २ तीहिं दंतिसहस्सेहिं तीहिं रहसहस्सेहिं तीहिं आससहस्सेहिं तीहिं मणुस्सकोडीहिं सद्धिं संपरिवुडा सव्विड्डीए जाव रवेणं सतेहिंतो २ नगरेहिंतो पडिनिक्ख मह ता मम अंतियं पाउब्भवह, तते णं ते कालाईया दस कुमारा कोणियस्स रन्नो एयमट्ठं सोच्चा सएसु २ रज्जेसु पत्तेयं २ ण्हाया जाव तीहिं मणुस्सकोडीहिं सद्धिं संपरिवुडा सव्विड्डीए जाव रवेणं सएहिंतो २ नगरेहिंतो पडिनिक्ख मंति जेणेव अंगाजणवए जेणेव चंपा नगरी जेणेव कूणिए राया तेणेव उवागता करतल जाव वद्धावेंति, तते णं से कूणिए राया कोडुंबियपुरिसे सदावेति ता एवं वयासी-खिप्पामेव भो देवाणुप्पिया ! आभिसेकं हत्थिरयणं पडि कप्पेह हयगयरहचातुरंगिणिं सेणं संनाहेह ता मम एयमाणत्तियं पच्चप्पिणह जाव पच्चप्पिणंति, तते णं से कूणिए राया जेणेव मज्जणघरे तेणेव उवागच्छइ जाव निग्गच्छित्ता जेणेव बाहिरिया उवट्टाणसाला जाव नरवई दुरूढे, तते प से कूणिए राया तीहिं दंतिसहस्सेहिं जाव रवेणं चंपं नगरीं मज्झमज्झेणं निग्गच्छति ता जेणेव कालादीया दस कुमारा तेणेव उवागच्छइ ता कालाईएहिं दसहिं कुमारेहिं सद्धिं एगतो मिलायंति, तते णं से कूणिए राया तेत्तीसाए दंतिसहस्सेहिं तेत्तीसाए आससहस्सेहिं तेत्तीसाए रहसहस्सेहिं तेत्तीसाए मणुस्सकोडीहिं सद्धिं संपरिवुडे सव्विड्डीए जाव रवेणं सुभेहिं वसहीहिं पायरासीहिं नातिविगिट्ठेहिं अंतरावासेहिं वसमाणे २ अंगाजणवयस्स मज्झमज्झेणं जेणेव विदेहे जणवते जेणेव वेसाली नगरी तेणेव पहारित्थ गमणाते, तते णं से चेडए राया इमीसे कहाए लद्धट्ठे समाणे नव मल्लई नव लेच्छई कासीकोसलका अट्टारसवि गणरायाणो सदावेति ता एवं वयासी-एवं खलु देवाणुप्पिया ! वेहल्ले कुमारे कूणियस्स रन्नो असंविदितेणं सेयणगं अट्टारसवंकं च हारं गहाय इहं हव्वमागते, तते णं कूणिएणं सेयणगस्स अट्टारसवंकस्स य अट्टाए तओ दूया पेसिया, ते य मए इमेणं कारणेणं पडिसेहिया, तते णं से कूणिए मम एय मट्ठं अपडिसुणमाणे चाउरंगिणीए सेणाए सद्धिं संपरिवुडे जुज्झसज्जे इहं हव्वमागच्छति, तं किन्नु देवाणुप्पिया ! सेयणगं अट्टारसवंकं हारं च कूणियस्स रन्नो पच्चप्पिणामो ? वेहल्लं च कुमारं पेसेमो ? उदाहु जुज्झित्था ?, तते णं ते नव मल्लई नव लेच्छती कासीकोसलगा अट्टारसवि गणरायाणो चेडगं रायं एवं वदासी-न एयं सामी ! जुत्तं वा पत्तं वा रायसरिसं वा जन्नं सेयणगं अट्टारसवंकं च हारं कूणियस्स रन्नो पच्चप्पिणिज्जति वेहल्ले य कुमारे सरणागते पेसिज्जति, त जइ णं कूणिए राया चाउरंगिणीए सेणाए सद्धिं संपरिवुडे जुज्झसज्जे इहं हव्वमागच्छति तते णं अम्हे कूणिएणं रण्णा सद्धिं जुज्झामो, तते णं से चेडए राया ते नव मल्लई नव लेच्छई कासीकोसलगा अट्टारसवि गणरायाणो एवं वदासी-जइ णं देवाणुप्पिया ! तुब्भे कूणिएणं रन्ना सद्धिं जुज्झह तं गच्छह णं देवाणुप्पिया ! सतेसु २ रज्जेसु ण्हाया जहा कालादीया जाव जएणं विजएणं वद्धावेंति, तते णं से चेडए राया कोडुंबियपुरिसे सदावेति ता एवं वयासी आभिसेकं जहा कूणिए जाव दुरूढे, तते णं से चेडए राया तीहिं दंतिसहस्सेहिं जहा कूणिए जाव वेसालिं नगरं मज्झमज्झेणं निग्गच्छति ता जेणेव ते नव मल्लई नव लेच्छती कासीकोसलगा अट्टारसवि गणरायाणो तेणेव उवा गच्छति, तते णं से चेडए राया सत्तावन्नाए दंतिसहस्सेहिं सत्तावन्नाए आससहस्सेहिं सत्तावन्नाए रहसहस्सेहिं सत्तावन्नाए मणुस्सकोडीहिं सद्धिं संपरिवुडे सव्विड्डीए जाव रवेणं सुभेहिं वसहीहिं पातरासेहिं नातिविगिट्ठेहिं अंत रावासेहिं वसमाणे २ विदेहं जणवयं मज्झमज्झेणं जेणेव देसपंते तेणेव उवा० ता खंधावारनिवेसं करेति ता कूणियं रायं पडिवालेमाणे जुज्झसज्जे चिट्ठइ, तते णं से कूणिए राया सव्विड्डीए जाव रवेणं जेणेव देसपंते तेणेव उवा० चेडयस्स रन्नो जोयणंतरियं खंधावारनिवेसं करेति, तते णं ते दोब्बिवि रायाणो रणभूमिं सज्जावेंति ता रणभूमिं जयंति, तते णं से कूणिए तेत्तीसाए दंतिसहस्सेहिं जाव मणुस्सकोडीहिं गरुलवूहं रएइ ता गरुलवूहेणं रहमुसलं संगामं उवायाते, तते णं से चेडए राया सत्तावन्नाए दंतिसहस्सेहिं जाव सत्तावन्नाए मणुस्सकोडीहिं सगडवूहं रएइ ता सगडवूहेणं रहमुसलं संगामं उवायाते, तते णं ते दोण्हवि राईणं अणीया सन्नद्ध जाव गहियाउहपहरणा मंगतितेहिं फलतेहिं निक्कट्ठाहिं असीहिं अंसागएहिं तोणेहिं सजीवेहिं धणूहिं समुक्खित्तेहिं सेरेहिं समुल्लालिताहिं डावाहिं ओसारियाहिं उरूघंटाहिं छिप्पतूरेणं वज्जमाणेणं महया उक्किट्ठसीहनायबोलकलकरवेणं समुहरवभूयंपिव करेमाणा सव्विड्डीए जाव रवेणं हयगया हयगएहिं गयगया गयगतेहिं रहगया रहगतेहिं पायत्तिया पायत्तिएहिं अन्नमन्नेहिं सद्धिं संपलगा यावि होत्था, तते णं ते दोण्हवि रायाणं अणिया णियगसामीसासणाणुरत्ता महता जणक्खयं जण व्हं जणप्पमहं जणसंवट्ठकप्पं नच्चंतकबंधवारभीमं रुहिरकहमं करेमाणा अन्नमन्नेणं सद्धिं जुज्झंति, तते णं से काले कुमारे तीहिं दंतिसहस्सेहिं जाव मणुस्सकोडीहिं गरुलवूहेणं एक्कारसमेणं खंधेणं कूणिएणं रण्णा सद्धिं रहमुसलं संगामं संगामेमाणे हयमहित जहा भगवता कालीए देवीए परिकहियं जाव जीवियाओ ववरोवेति, तं एवं खलु गो० ! काले कुमारे एरिसएहिं आरंभेहिं जाव एरिसएणं असुभकडकम्मपब्भारेणं कालमासे कालं किच्चा चउत्थीए पंकप्पभाए पुढवीए हेमाभे नरए नेरइयत्ताए उववन्ने । १८। काले णं भंते ! कुमारे चउत्थीए पुढवीए अणंतरं उव्वट्ठित्ता कहिं गच्छिहिति कहिं उववज्जिहिति ?, गो० ! महाविदेहे वासे जाइं कुलाइं भवति तं०-अइढाइं जहा दढप्पइभो जाव सिज्झिहिति बुज्झिहिति जाव अंतं काहिति, तं एवं खलु जंबू ! समणेणं भगवया जाव संपत्तेणं निरयावलियाणं पढमस्स अज्झयणस्स अयमट्ठे पं० । १९॥ कालज्झयणं ८-१॥ जइ णं भंते ! समणेणं जाव संपत्तेणं निरयाव-लियाणं पढमस्स अज्झयणस्स अयमट्ठे पं० दोच्चस्स णं भंते ! अज्झयणस्स निरयावलियाणं समणेणं भगवया जाव संपत्तेणं के अट्ठे पं० ?, एवं खलु जंबू ! तेणं कालेणं० चंपा नामं नगरी होत्था, पुन्नभदे चेडए, कोणिए राया,

पठमावर्द्ध देवी, तत्थ णं चंपाए नयरीए सेणियस्स रन्नो भज्जा कोणियस्स रन्नो चुह्दमाउया मुकाली नामं देवी होत्था मुकुमाला०, तीसे णं मुकालीए देवीए पुत्ते मुकाले नामं कुमारे होत्था मुकुमाले०, तते णं से मुकाले कुमारे
अभया कयाति तीहिं दंतिसहस्सेहिं जहा कालो कुमारो निरवसेसं तं चेव जाव महाविदेहे वासे अंतं काहिति, एवं निरयावल्लियाणं वीयस्स अज्झयणस्स अयमट्ठे पणत्तेत्ति वेमि ॥ वितियं मुकालअज्झयणं ८-२ ॥ एवं सेसावि
अट्ठ अज्झयणा नेयवा पढमसरिसा, णवरं मायातो सरिसणामाओ । २० ॥ अज्झयणाणि ३-१० ॥ निरयावल्लियातो समत्तातो ८ । निक्खेवो सवेसिं भाणियवो **अ/गम-२०→** श्रीकप्पवडिसिया-जति णं भंते ! समणेणं भगवया